

MANIFESTU PATU NATZIONALE PRO SU REFERENDUM

Sa cussèntzia natzionale e sa boluntade de autogovernu de su pòpulu de Catalugna tenet sena duda raighinas istòricas, antigas e fungudas, e s'est manifestada totora in ogni tempus. Oe, sa Catalugna est integrada in s'Istadu ispagnolu chi, pro resones innegàbiles istòricas, linguísticas e culturales, est plurinatzionale, mancari chi sas istruturas políticas suas no lu reconnoscant.

Su disìgiu de sa Catalugna de detzìdere su benidore políticu suo, s'est fatu semper prus evidente cara a su mundu. Finas a èssere una punna costante chi oe in die rapresentat sa boluntade de una majoria manna de sa populazione sua.

Intre sos deretos essentziales e inalienàbiles de sas sotziedades democràticas est reconnotu su de detzìdere su benidore políticu pròpiu. E est custu su deretu chi sustentat sa dimanda de una majoria de tzitadinas e tzitadinos de Catalugna, chi lu cherent materializare cun unu referendum.

Cherimus pònnere a notu chi sa boluntade de espressione de sas catalanas e de sos catalanos mediante unu referendum est majoritària e trasversale; a tenore de su totu cun sa determinazione tzìvica, patzìfica e democràtica chi ant espressadu sas manifestatziones numerosas de sa sotziedade organizada a favore de su deretu a detzìdere.

Afirmamus chi su quadru atuale giurìdicu ispagnolu, comente ant mustradu unos cantos espertos in deretu costituzionale, permitit sa realizazione in Catalugna de unu referendum de acordu cun s'Istadu. Si fintzas a oe non s'est dada custa possibilitade est istadu pro farta de boluntade de sos Governos de Ispagna. Su deretu, essende sugetu a interpretatziones diferentes, devet èssere intesu comente un'istumentu pro agatare soluzziones democràticas a sos problemas políticos e non pro nde creare àteros o pro impeorare sos chi giai esistent.

Sas pessones, sas entidades, sas organizatziones e istituzziones chi firmamus custu MANIFESTU bidimus su referendum comente un'istumentu privilegiadu de aprofundimentu democràticu chi permitit sa dibata política plurale, sas circa de cunsensos e s'adotzione finale de acordos eficatzes.

Pro totu custu:

Sollitzitamus sos Governos de sa Catalugna e de s'Istadu ispagnolu a propassare sa difficultades políticas e sos apriorismos, e a lograre in fines un'acordu chi apostivighet sas cunditziones e sas garantzias giustas e netzessàrias pro sa tzelebratzione de unu Referendum reconnotu dae sa comunidade internatzionale, cun unu resultadu chi devet èssere politicamente vinculante e efetivu.

Reconnoschimus su Parlamentu de sa Catalugna comente s'istituzione democràtica in ue si manifestat sa boluntade popolare de su paisu. Est pro custu chi amparamus sas iniziativas e acordos chi si leent in cussa sede pro sa realizazione de custu Referendum.

Manifestamus su cumbinchimentu chi su referendum est un'istumentu inclusivu, chi at a permittere sa libera espressione de sas positziones diferentes chi sos tzitadinos e tzitadinas de Catalugna ant espressadu cunforma a sa relazione política de sa Catalugna cun s'istadu ispagnolu.

Afirmamus chi sa cultura democràtica rechet soluzziones políticas a sos problemas políticos. E lu faghimus ricurrende a su mecanismu fundamentale chi disponet sas sotziedades modernas: connòschere e cunvalidare sa boluntade majoritària de su pòpulu chi si espressat cun su votu.

Custu referendum devet favorèssere s'ispiritu de partetzipatzione de totus. Est netzessària duncas una dibata democràtica a manera cuidadosa, plurale e cun cunditziones pariviles intre sos sèberos legittimos chi oe in die si manifestant in Catalugna.